



DECRETO EJECUTIVO 604





Nº 604

GUILLERMO LASSO MENDOZA

EKUADURNU AA UÑI PUMU

TSAAVE TENÑU:

Mitya: lala´ aa bale kiika Ekuadurchi tsumu, ya´ajke´ main shilli pilla tsumunu tsandive, Ekuadur juushu juntsaya Estado Constitucional deechuchi jumin, justesachi jumin, socialchi jumin, democrátikuchi jumin, aawayu pensa tamin, maali balelamu jumin, ma bulu juuñuujumin, wee wee cultura dechuve tyamin, nacionalidaalabain wee wee dechuve tyamin tseimin enu chumuyu tyamu.

Mitya: lala´ aa bale kiika Ekuadurchi tsumu, ya´ mandya main aa pilla shilli pemanu pilla tsumunu tsandive, kumuinchillanuren Estaduya tsaren deechu tadeeyu tyanu jumi, munuba wera´tya´keetyumujchi, aa kiika Ekuadurchi pilla tsumunu naatiñubain manen wee uñilabain piike´detsuñu naatiñubain tsanginuuyaa jumi.

Mitya: lala´ aa bale kiika Ekuadurchi tsumu, ya´ paitya mainnu artikulunu pena shilli pilla tsumunu tsandimi, chachillachi deechu judeeshu juntsala apeeta´ bale lamishtikenuuyaa jumi. Mubain kayu faatave ti´ ñu deechu tajtuye tinu dejutyu.

Mitya: lala´aa bale kiika Ekuadurchi tsumu ya´paitya mandya pallu pilla shiinamunu artikulu manchunga manda pallunu tsandimi, naa komuna labain, naa chunu tena talabain, naa pebululabain, naa nacionalidaa labain kayu ti proyectu kinu diyandubain chachillanu pake´meenu jumi, tsenmala chachilla ti pensa tana´ba de panmala tsanginuuyaa jumi.

Mitya: lala´aa bale kiika Ekuadurchi tsumu ya´ manchispen chungu taapullunu pilla shiinamunu artikulunu tsandimi, naaju aa bale ya ju´bain chachilla´deechu paate naakiñaa ura´sunden balelamishtinuñuba tsanginuuyaaa jumi. Tyee kayu faatañuba juntsabain kaapunuma pudema juula. Tsanginmalaa chachillabain, kumuna labain, chunu tena labain, pebulu labain, nacionalidaa labain ura´tya´chunu detsu.

Mitya: lala´aa bale kiika Ekuadurchi tsumu pilla shiinamu main, artikulu manbatsa´taapai chungu mandya pallunu tsandive, uñichive taawasha kemin, kikaamin aabalekiika pilla tsumu naatiñubain, kayu wee bale kiika pilla tsumula naadetiñubain.

Mitya: lala´aa bale kiika Ekuadurchi tsumu ya´artikulu paipatsa´mancha´lura pallunu tsandive, uñi´chachilla taawasha kilaya chachillanu ukemishtinuuyaa juve timi. Tsejtu narake kinuu jumin, sunden kinuu jumin, chaíta chachiyu tya´kimin, buuditaa kimin, pantsuu kinjutyumin, naakindubain keetaditaa ke´jintsunuuyaa jumi.

Mitya: Convenio Indígenala´ paatebain yumaa chachilla chumulachibain letara a- nu tsandive, entsa kiika pilla shiinamu naatiñuba tsanginuuyaa juve, tsenñu´mitya uñi judeeshu juntsala chachillanu pake´meranchin kenuuyaa jumi, yalanu tyeeba proyectu juuyaaba kenmala firu´tyainuu yaaba tse´tuwaa jutyu. Tsanginuu malaya chaítaatala pa aka kitu kumuinchi lanuren wa´kare´kuinda kimishtinuuyaa jumi.

Mitya: Declaración de las Naciones Unidas indígenala´ deechu paate tsandive, Estadula judeeshu juntsala chachillanu pake´meemin manen urake pensakitu tyaapa kumin kinuuyaa jula, indígenala´ chaítalaba kuinda kitu, kayu tsange shuiki´mujchi ley juuyaaba kendu.

Mitya: Corte Constitucional juushu juntsa tsandimi entsa kiika ke´faawaatu 028-19-IN/22 eneru chu´chayachi maluya 19, tsenmala añuya 2022-chi, chachillanu pake´mera paate entsandive; 1) entsalanun keedi´pake´mera juu: kumunala nubain, cha´chunu tena talabain, pebulu lanubain, nacionalidaa lanubain. 2) tujlenu jutyuve pake´mera juushu juntsa paate,

ambienteba. 3) pake´mera jumiya chachilla´deechulanu wera´kinjutyuñanga titaa tsandinujumi.

Mitya: uñi´ bale chachilla naati´chachilla´deechu paate jutyuve panu pudejdetuve, tsenmin tukish keenubain jutyuve, chachillanu pake´meenu paate naaketaa pilla tsutyunmala Ekuadur uñi ke´faawaanu pudemi. Tsangimiya Ekuadur uñi juushu juntsa bale lanuu juñu´mitya kumunalachibain, chunu tenalachibain, pebulu lachibain nacionalidaa lachi bain.

Ekuaduu uñinu tsanguikaamu artikulu dejuve 141, N°.- 5 y 13 articulo 147 aakiika pilla tsumunu tsana shiina, tsenmala artikulu 11-bain juve estatuto de régimen jurídico y administrativo Ekuaduu uñi naake taawasha kinuuñuba pilla tsura, entsalanu keedi´pataa bale kiika piike´faawaantsuve.

KAYU LEY JUUÑUBA TSANGUE SHIIKATYUMUJCHI NAAKITAA CHACHILLANU AJKATYU PAKE´MEENU JUÑUBAIN JUN TSA PAATE UÑI KE´FAAWAAWAA KINU TIJTU PIIKE´TSURA.

Aa shiikara main.

NUNBI JINGUE TA´PUNUJU´BAIN, MANEN EN TSA EN TSA KINUUVE TIJTU BAIN.

Wela´pilla main. Tyaanguinu ti´bain nunbi jingue ta´punuju´bain.- Entsa pilla juushu juntsa narake shiikanu pensa tanatu chachillanu ajkadyu pake´meenu paate kayu ley tsangue shiikaaty mujchi. Nunbi nunbi ta´pu´kinuuñuba kumuinchi uñi´chachilla juntsangue kinun judeeve, mandinbu ley kikinuwatala chachilla´deechu judeeshu juntsalanu firu´ta´kan jutyu, naa kumunala´ deechulanubain, naa chunu tenatala´deechulanubain, naa cha´pebulula´deechulanubain, naa nacionalidaala´ deechubain, yumaa lala´Ekuadur constitucionchi tsaama keengaya pilla tsuraalanu.

Chachillanu ajkadyu pake´mera juushu juntsa, uñi´chachilla naakiña ura´tse´tu nuuñuba tsangenu pude deeve, aa bale kiika Ekuadurnu shilli pilla tsumunu tsandive wela´pilla 84 juushu juntsanu.

Wela´pilla pallu.- Naatiñuba tsanguide ti´mujchi.- Chachillanu ajkadyu pake´mera juushu juntsaya naadetiñubain manen ti pensa tadeeñuba mijanu, tsaimiren kayu ura´shiikaanu kumunala judeeshu juntsalabain, chunu tena judeeshu juntsala bain, naadetiñuba aa bale kiika uñi piike´ faawaanu diyantsumunu.

Kai´bi padetyeeshu juntsanu naatiñubain chachilla naadetikañuba uñi´chachilla tsague kaapu´shiikanu dejutyuve. Tse´mitya uñi´chachilla titi ka´pu´shiikana´ba tsangue´ajkesha ke´jinnuujula tyeekinu pilla tsuunduba.

Wela´pilla pema.- Ajkadyu pake´meenuulanu.- Ajkadyu pake´meekutinuu julaya entsalan judeju kumunala, chunutenala, pebulula, nacionalidaalabain, pake´meenu tijtu kumuinchilanu wa´kaatubain tsangui´miya chaitalanun pake´meekitu bain.

Tsenmala mantsa indigenala jeleshan chunamulanuya naake´ajkadyu pake´meren tsaju, yalanuya naake´keegaya fale´panu pudejdetu´mitya, Ekuarchi aa bale kiika pilla tsumunu tsandive

Wela´pilla 57-nu tsandimin manen peledijkinu pillabain 21 shillibain tsandimi.

Wela´pilla taapallu.- Ajkadyu pake´meemula.- kumuinchi uñi´chachilla entsa paate keetadi´taawasha kemulaa juntsa deeve.

Entsa paate bale kiika juu ke´faawaanu tyatuya Ekuaduu Uñi ya´pelesha pumu chaitalanu tsangide ti´uuden tsuunu pudemi.

Wela'pilla manda.- Tsaá pensa.- Ajkatyu chachillanu pake'mera kinu paate juushu juntsaya entsaa pensanu keeditaa tsanguinuuyaa jumi.

Main. **kimishtya.-** kayu ti kenu pensa'ba kayu muute ki' faawaatyumujchee chachillanu ajkatyu wandi'pake'mera kinuuyaa jumi, naadetikañuba meenanu.

Pallu. **Keenanu tinbu.-** chachillanu ajkatyu pake'mera kinuuyaa narake de akusta kita de wa'kare'kuinda kimishtitaa pake'mera kinuu juve.

Pema. **Uranchi pensa.-** uñi'chachillabain chachilla pake'mee kutimulabain naake pensa ke'ba achakaliti papatiña urave, lu'tsa'palaa baleve tenna patu.

Taapallu. **Weewee culturaba de buluu.-** Chachillanu ajkatyu pake'mera kinutyatu wee wee cultura chudenashu juntsala nubain plurinacionalidaa nubain keetadinuuyaa jumi.

Manda. **Kuinda.-** uñi'chachilla uma beleren kuinda lengue'mijainuula ajkatyu deveenuu jumi chachillanu chunu tenalanu pebululanu, nacionalidalanu bain, naa pillanchi juuñubain, naa radiutala pati'bain, tsenmin lu'tsa'paalachi.

Manda main. **Lu'tsaki .-** Uñi'chachilla ajkatyu pake'meenuu menestetu chachillanu demijakaamala naajula pake'meenu uratala punutya'ba jinutyatun jinujuu maali pensachi.

Manchishpallu.Narake ta'nu.- Chachillanu ajkatyu pake'meenu paate juushu juntsa achakaliimin apeetan jumin kinuuyajuve, tsaaren chachilla de chuñu keetaditu. Taada inuya jutyuve tsanguinuu meneste falendyuya naa pake'meemulabain, naa pake'meekutimulabain.

Wela'pilla manchishmain.- Ajkatyu pake'mera naajunuñuba .- **entsalaa juntsadeeve ajkatyu chachillanu pake'merakinu:**

Main. Chachillanu ajkatyu pake'mera kinuu jumiya kayu ti paate pake'meenu ju'ba kiikanu tsange piike'tsuutyumujchi.

Pallu. Ura'kimishti kinuu proyectu uñi ke'faawaanu tyatu kayu weelanu bain mija kaanu jumi naa pebulusha chumulanu, jelesha chumulanubain, kiika mii chachillanubain kayu jungajte, yala'pensa ka'mai'tenu proyectunu.

Pema. Chachillanu ajkatyu pake'mera juushu juntsa prelegislativaya vera'juve chachillanu wa'kare'kuinda ke'pake'mera popular juushu juntsanu manen pake'mera ambiental paate juushu juntsalanu tenganmala vera'jumi.

Taapallu. Chachillanu wa'kare'kuida ke'pake'meetu yala'patsaki juntsa proyectu uñi kenupensa taashu juntsa chachilla'deechulanu firu'ba tse'tuwaanuuve tyatu juntsa paateren pakanu pa'tsuunu jumi.

Wela'pilla manchish-pallu.- Muwaa tsanguinuñuba.- uñi'chachilla yalaa entsa paate chachillanu pake'mera prelegislativa juushu juntsa kemishtinu pudela. Naaju bale chachilla juntsa ley kasa faawanu tya'bain yalaa kayu pake'meemishtinu pudela, tsaaren veelanu kemishtikai ti'bain tsangenu pudedeju.

Tsanguinaaba juñuya, artículo 226 aa bale kiika ekuadurchi pilla tsumunu naatiñuba tsanguinuuyaa jumi, bale chachiitalla debuudi'tsanguiñu urave tyatuya veta'veta' tyaapa kunuujuve .

Wela'pilla manchish-pema.- Tsanguiñu yuj urave ti'pakaya uñi'chachilla'paate.- kayu proyecto tipaate kinu ju'ba tsange shiikaaty mujchi umanbele tsangiñu urave ti'kuinda depiike'tsuuñu tananujula. Entsa kuinda piike'tsuulaya uñi'chachilla. Tsaaren juntsa kuinda jumiya proyectu ke'faamalaya chachillanu yala'deechu muishpu'ta'kanjutyuñubain naa tsaaju nuuñubain nara wandyanu jumi.

Wela'pilla manchish-taapallu.- Tyaapa pumula chachillanu ajkatyu pake'mera prelegislativa entsa kiika naatiñuba tsanginu jumi, tse'mitya tyaapa kunuu jumiya Secretaría de Gestión y Desarrollo de Pueblos y Nacionalidades-sha pumu tandiyajuu chachillaa tyaapa kunuu jumi.

Tsanginu uwatala entsa aseetaju chachilla nara kuinda shiikara tananuu jula nan dejuñubain, kumunala, cha'chunu tenala, pebulula, nacionalidaalabain.

Wela'pilla paitya.- Lushi nan jinuuñuba chachillanu ajkatyu pake'mera prelegislativa naaju uñi'chachii tsangenu tya'ba juntsaa lushi mi'ke'kimishtinuu jumi, tsangindyatuya veemujtubain tyaapa pake'lushi katatubain kinuu jumi.

Wela'pilla paitya-main.- Peepu'jinu shiikara.- chachillanu ajkatyu pake'mera prelegislativa paate entsange ta'nuuyaa juve:

Main. Peepu' kimishtinu

Pallu. Kumuinchilanu mijakara jadei ti'wanditu

Pema. Wa'kare'pake'mera

Taapallu. Chachilla depakañu tandinyange'keenu, tsange'llu'nu pake'mera juushujuntsa.

Chachillanu ajkatyu pake'meenu urabi vee palaachi manba'meewaawaa kimula punu dejuve tsanginaaba menestenmala chachilla'den panu palaachin padee mala uñi'chachilla tandiya kindejui'ñu'mitya.

Aashiikara pallu

PEEPU'KIMISHTINU.

Wela'pilla paitya-pallu.- Naajulanaa pake'meenu ju'ba mitya.- Uñi'chachilla yumaa kuinda chachilla'chundala ma proyecto kenmala yala'deechunu gaase'kiki nuuñubain, yumaa mija'chutaa umaa naaju chachillanaa, junaa tsangui'miya naaju naaju chunu tena tala te'kalaakinñunge' kuinda kimishti'pake'meenu jula. Tsanginuuya Secretaría de Gestión y Desarrollo pebululachi, nacionalidaalachibain engu pumu kiika aa mi chachillaba kenuuyaa juve. Chunu tenala, kumuna, pebulu, nacionalidaabain juntsa proyecto dekinmala yala'deechu gaase'tiyainuunuba, uñi'chachilla yalanuya pake'meenu dete'kalaatyunmala yaibain pake'meekutinu pude deeve, tsaaren narati waintu nutalaa yala'dechu gaase'tiyainuunuba shili patu.

Tsandi'mujchiren pake'meekutinu depa'mala uñi'chachilla meepungi kindejutyuve.

Aashiikara pema

PAKE'MERA KINUDETSUYU TI'CHACHILLANU WIJADEI TI'WANDYA.

Wela'pilla paitya-pema.- Wádi jadei ti'wandya.- Naaju chachillanaa, naajuchunutenatala proyecto kenmala yala'deechu gaase'ba tiyanuujuñuba yumaa dekatapu'deshiikare'tanatu, paitya malu iinmalaren uñi'chachilla wa'di jadei ti'kuinda faawaanuyaa jumi, tsenmala chachilla wa'di'pake'meekuti'pensa panuuyaa jula.

Entsa kuinda wa'di jadeit i'kuinda juushu juntsa, uñi'chachilla naakiñaa chunu tena tala chumu chachilla mija'wa'dinuu deenubain tsanginuu jula naa radiutala, naa televisiuntala, naa periudikutala, naa mediu dijitalestalabain kuinda tsuunuuyaa jumi.

Wela'pilla paitya-taapallu.- wa'dinu jadei ti'kuinda wandyanu kayu weekuinda mityaa.- Uñi'chachilla, chachillanu ajkatyu pake'meenu ti'kuinda faawaatu, jungajte entsa kiiikalaa faawaanuyaa dejuve:

Main. Proyecto ke'faawaanu juushu juntsa:

Pallu. pake'mera prelegiativa paate juushu juntsa naake ta'un ju'ba pilla

Pema. Ti malu talaa juntsa pake'mera prelegislativa.

Entsa kiika mai'ta judeeshu juntsala indigenala'palaachi tene pillaayaa junu dejuve.

Aa shiikara taapallu

UMAA PAKE'MERA TSE'TUWARA.

Wela'pilla paitya manda. - Chachilla wa'ditu kuinda yatekara.- chachillanu wa'di jadei ti'kuinda demija kaañu, dewa'dinmala Uñi'chachilla kiika deveenu jula proyecto paate panu judeeshu juntsa.

Tsenmala umaa chachillaa yaitene naakitaa kuinda ke'pawiike'entsageñaa urave ti'pakakenu ju'ba tsangenu jula. Tsangenu uwatala veechachilla, naa uñi'chachilla juubain paweten punu dejutyu.

Chachilla ajkatyu pake'meekutimula, kayu juntsa proyecto paate narake aseetangenu tyatuya tandiya juu chachillanu pake'mera'kuinda narai mijanu pude deju, tsanginuuba juve tyatuya.

Wela'pilla paitya- manchis-main.- Chachilla'pakañu kuinda uñi'chachillanu puita.- Chachilla de wa'di'proyecto paate narake tandiyange'kuinda yate kare'deshiikaatu macha'lura malu insha, yumaa uñi'chachillanu puitenuu juve. Entsa kuindanu naati pa'bain juntsa tsange kiika pilla'chiti'tsuumin, manen naa wa'dimula'firma juula shiikaraabain mai'tenu jula, tsangimee uñi'chachillanu kunu jula yala'tyaapanu kuwa kinaa ju'bain, tsangi'miya correo institucionalnu ereke, tsangi'miya plataforma digitalnu erekenaaju'bain tsanginu jula.

Aa shiikara manda

CHACHILLA'KUINDA KA'KERE'PAWII KETU TSANTSAMEE DYAINU.

Wela'pilla paitya manchish-pallu.- chachilla'kuindanu pawiike'yate kara.- Uñi'chachilla tena tala chumu chachilla, naati pa'shuwa'ba kuinda de eeñu, man malu juutalaren ka'kere'pawiike'deshikaanu jula, tsange' proyectunu shiikaanu.

Wela'pilla paitya manchish-pema.- tsatsan juuve ti' piike'tsura.- Uñi'chachilla entsaa kuinda tse'tuñuve ajkatyu pake'mera kuindanu tsandi'piike'faawaanu jula, tsangimiren kumuinchi kiika faaware' tsangimiren chachillanu pake'meenu diyandu naake kiika tse'tuware'bain kumuinchi debuungare'tsuunuyaa juve.

Entsa acabadu kiika piike' tsuu miya, naaju uñi'chachi proyecto kimishtinduba juntsaa acabadu kiika ke'tsuunuyaa jumi, tsenmala naajula keedi'tsange piike'tsuunaju'ba tsanginudetsu. Entsange deta'mala umaa ajkatyu pake'mera paate tsatsamee jiinu jumi.

ENTSAGINUUVE TI' PILLA' TSURA MAIN JUU:

Tsandennaren chachilla, pebulula, nacionalidala ajkatyu pake'mera kuinda yala'pawiike'kuinda tsura uñi'chachilla tyaapasha deposite tyunmala uñi proyecto naake pensake'faawaatu bain tsange shuikinujuu.

Uñi'chachilla akabadu kuinda piike'fawaanu dejuve, chunu tena tala chumu chachilla ajkatyu pake'meranu tiba eje dekityaa tijtu.

TSATSAN ENTSANGE' PUIEDEI TI' PILLA TSURA.

Ajke'shiikara naaju proyecto uñi'chachilla ke'faawaandubain entsa kiika ke'tsuunu uwabi naake chachillanu ajkatyu pake'meenu jintsunuuya juve. Tsajutyaaba jushu juntsaya entsa kiikanu naatiñubain tsange mannuuyaa deju.

Bene shiikara pilla pallu.- Secretaria de Gestión y Desarrollo pebululachi bain, nacionalidaa lachibain tsangi'miya naaju uñi'bale chachi tsanginaaju'bain macha'lura malu iinu tala yumaa proyecto akabadu shili de us eenuujuve kumuinchi uñi'keetala mi'namu bale chachillanu. Tsaimiren comunas chunu tenatalabian, pebulutalabain nacionalidaalanubain. Chachilla'chunu tena judeeshu juntsala challanchi naadejuñubain tsana mi'ta tananuuyaa dejuve.

Bene shiikara pilla pema.- Kumuinchi uñi'chachillanu ajkatyu pake'mee kinuu meneste inuuve tyatu, lushi añumee pake'tananu dejuve.


ENTSANGINUUVE TI' TSATSAN PILLAA

Entsa kiika pilla' tsura, kumuinchi Ekuadurnu chumula tsandya' keenu detsu, registro oficialnu piike' faawaamalaa tsai shuwanu juve.


Entsa tse'tumi uñi'chunu yanu, Distrito Metropolitanu de Quito, noviembre chu'chayachi, malu 28, tsenmala añu 2022.


Guillermo Lasso Mendoza

EKUADUU AA UÑI PUMU



REFORMA AL REGLAMENTO
AL CÓDIGO ORGÁNICO DEL AMBIENTE





N° XX

GUILLERMO LASSO MENDOZA

LALA´REPUBLICANU PUMU AA UÑI PUMU.

TSAAVE TENÑU:

Mitya, lala` aa bale kiika Ekuadurchi ya´ artikulu pemanu bain pendijki manchishpallunubain estadu ecuatorianuchi juushujuntsanu tsandive: lala´ chipala judeeshujuntsanubain veevee kultura judeeshujuntsalanubain munuba mushkikaanjutyu pudeve: “(....)7. (...)”,

Mitya, lala` aa bale kiika ekuadurchi ya´artikulunu 14 tsandive: “(..) naaju chachillabain deechu tadeeve naranandala chunu, ishuwa mushajtu, chachillabain uratene, chipala judeeshula juntsalabain ura´chunu. Kumuinchi Ekuadur tu juusha chumu judeewashu juntsa duweni deeyu tse´mitya chipala washkinu, chipala tsanamishtinu, kumuinchi animaalachibain, pibain, sera´chunu juushu juntsabain, na´baasa kikarenjutyu juushu juntsabain, mushandala ura´mantsumibain, tsaave, (...)”,

Mitya, lala` aa bale kiika Ekuadurchi artikulu 71 juushu juntsa ajke´shili pillanu tsandive: jele juushu juntsa tsaren deechu tave tsejtu tsandimi: “(...) jele juushu juntsa najulanubain awakaantsu, tse´mitya yanu balengure´washkimin mawajpu´ ma awakaamin ya naaken chumuwaañubain tsangekaanchunuu yaa jumi (...)”,

Mitya, lala` aa bale kiika Ekuadurchi ya´artikulu 73-nu bain ajke´shillipillanu tsandimi: jele deechu tave tsejtu tsandimi: “(...) Ekuadur Estado juushu juntsa naakiña jelesha chumulanu muish kikaajutyu´bain manen na´baasa wera´tse´tuwaa juntyuñuba tsaange kiika piike´tsuunujumi (...)”,

Mitya, lala` aa bale kiika Ekuadurchi ya´artikulu 83-nubain manchishmain pillanu tsandive, kumuinchi ekuaturianula supulabain unbeerukulabain: “(...)6 jele ya´deechulanu firu´ta´kanjutyu, chundala ashana chumishtinu tsaimin u´tange´meneste kusas kalaakinu jelesha, naana´ba tsananutsu laabain tsangenchunu (..)”,

Mitya, lala` aa bale kiika Ekuadurchi ya`artilukulu 226-nu tsandimi: “(...) uñi` bale chachilla judeeshu juntsala lala`aabale kiika naatiñubain tseimin leyneu bain naatiñubain juntsaren kinu pudeeve. Tsangimishtinu pudeve pa`akaketu naakitaa entsa paate tsangimishtinuuñuba. (...)”,

Mitya, lala` aa bale kiika Ekuadurchi ya artikulu 227-nu tsandive: “(...) uñi`chachilla taawasha juushu juntsa kumuinchi chachillanu sundentyaapa kunuuyaa juve ura`kimin asha kimin chaitala`kentsumi kemin veelanu bain, kikaamin buudi`kimishtimin naakeki`bain mangenuuju: “(...)”,

Mitya, lala` aa bale kiika Ekuadurchi ya`artikulu 276-nu taapai shilli pillanu tsandive : “(...)4. Chipala matse`tuware`washkenchunu, tsange` ura`chunu, pi bain ishuvabain, tu bain, kayu weekusas tu tandala pumu bain (...)”;

Mitya, lala` aa bale kiika Ekuadurchi ya`artikulu 395-nu tsangideitive: “(..) 1. Ekuadur Estado juushu juntsa naakiña chachilla ura`chunudeeñuba tsangimishtinchunu main kiika piike`faawanu jumi, tsenmala kumuinchilaren jelenu washkenchunu, bene faamu kaillachi ura`ke`chujnu. 2. Chi paate kiika piike`tsuranu washken chunuudejuve kumuinchilaren chipalanu. 3. Ekuadur Estado naaju chachillanu bai kumuna, chunu tenatalabain, pebulu, nacionalidaalabain entsala sunden keetadinaa jula chipalanu firu`kikaanjutyu. 4. Tsandennaren ura`tandiya dendyunmala chiipaate kiika tsuranu, tsaaba junmala naakiña jelechpalasha mushpunjutyuñuba juntsaaya kinujuve. “(...)”;

Mitya, lala` aa bale kiika Ekuadurchi ya`artikulu 398-nu tsandive “(...) uñi chipaasha tyeeba kinu uuden kitu tsenmala entsa uuden tinaaba mushpukinu junmala tenatala chumulanu pake`meenuuyaa juve narake kuinda waintu. Entsa paate ajkadyu pake`meenu juushu juntsa paate ley main ke`faawaanuuyaa juve tsangenu, juntsa leyneu naake kenuu juñuba tsangenu jumi. Ekuadur Estado bale kuunuuya jumi chachilla`pensake`pakañu tsuminu. Tsandenna chachilla`palaa uñi`proyektunu ura`kinjutyaa tyatu demeetyula, kikaanu tyai`tu, tsenmala uñi`chachilla naakiña ura`tse`tunuuñuba tsange piike`tsuunu jula.”(...)”;

Mitya, chachilla kuinda mijanu deechu tadeeve ti' uñiitala pa' akake'tsura juushu juntsanu ya' articulo 7-nu tsandive. Shiikara tsuve naakitaa chachilla chipala paate kuinda mija'chunu detyañuba tsangekaanu tsange'yaibain pawete'palaa tsange shiikaanu.

Mitya, declaración de Rio chipalapaate awanu paate bain año 1992-chi, ya'principiu paitya juushu juntsanu tsandive, chipalapaate patinuu palaayaa kumuinchi chachillaba wa'kare'patiñaa urave tive.

Mitya, ley orgánica de participación ciudadana ya' artikulu 82-nu tsandive: (chipala paate pake'mera tenatala chumulanu.- uñi'kinu pensa chipala paate kayu tsange shiikaatyumujchi chachillanu pake'meenuuya juve, tsaaren narati wainve naajuñuba. Pake'meemuya Ekuador estaduaa juve. Ekuadur Estado juushu juntsa bale kuunuuyaa jumi chachilla palaa demeewaañu, aabale kiika Ekuadurchi pilla tsumunubain, instrumentos internacionales chachilla'deechu paate naatiñubain manen ley naatiñubain.);

Mitya ley orgánica de participación ciudadana ya' artikulu 83-nu tsandive: (balenkura.- pake'meekutimula'palaa uñi'proyectunu meepungi dekityunmala uñi'chachilla naakiñaa ura'tya'ba kiika tsange piike'tsure' kayu kai'sha puitenuu jula. Tsandennaren yala'pensaya proyecto kinbera kinuuve chipaasha ta'pukinu tyashu juntsaya mushai'ba inmala ura'mange'chujnuu juñuba tsanginu jula, tsenmala jundaa chumu chachilla na'baasa yala'chundala firu'katai'nu detsu);

Mitya, código orgánico chipaate ya' artikulu 184-nu tsandive: (chachillabain pave'nu. Chipaate keetanamu chachilla kuinda mijakaanuuyaa juve, chunu tena tala, uñi tyeeba kikinuu tyandu, tsandenna chipalasha mushai' chundala vera'tiyai tsaaba tse'tuñuunu tyatu. Chachillanu wa'kare'pake'mera yala'pensa mijanu. Tsandenna chachilla' palaayaa uñi'proyecto kinu pensanu, kinu mujkajdetuyu tinmalaya, uñi'chachilla naakiñaa urañuba tsanginuuyaa dejuve.);

Mitya, uñi'tsangideiti'kiika faawara 59, registro oficial suplemento 478 junio chu'chayachi malu 22 año 2021, ya'artikulunu tsandive kuinda veenuude juve

acuerdu de Escazú naatiñuba, kayu sentencianu mijakaa miya chachilla entsanandala lu'tsakiba kuinda naraimija'chunu chipala paate pakayandala;

Mitya, sentencia numero 22-18-IN/ 21, Corte Constitucional Ekuadurnu chumu tsandive párrafo 142-nu: (Ekuadur Estadu juushu juntsa kuinda mijakaanuuyaa juve chachillanu pake'mera kikutyainuulanu, tsaimin yala'chunda uñi'proyecto ke'faamala mushpuki'bakinudeeñu. Entsakuinda apeeta'mijakaanuuyaa jumi);

Mitya, sentencia 22-18-IN/21, chu'chaya septiembre malu 8 año 2021, Ekuadurnu chumu Corte Constitucional tsandive (5. Artikulu 184 Código Orgánico Chipaate pakayaashu juntsa chachillanu pake'meenu juve, narake mijakare'kuindakimishti'wanditu.”)

Mitya, sentencia 22-18-IN/21, chu'chaya septiembre, malu 8, año 2021, Ekuador Corte Constitucional tsandive: (numero 7. Balejtu tirenu artikulu 462-bain 463- bain RCOAM-chi. Tsejtu Ekuadur uñinu uuden kimi reglamentu ke'faawaanu menesteeve titu);

Mitya, sentencia 1149-19-JP-/21, chu'chaya noviembrechi, malu 10, año 2021, Ekuador Corte Constitucional tsandive, parrafu 274-nu: (uñi'chahi ajkatyu pake'meenutsumu chipaate: artikulu 398-nu tsandimi chunutenatala chumulaa deechu tadeeve ajkatyu pake'meekutinu chipala nemushai'ba inuuñuba pake'meenu uñi'proyecto kinu diyantsuñu.);

Mitya, sentencia 11 49-19-JP-/21, chu'chaya noviembre, malu 20, año 2021, Ekuador Corte Constitucional, ya'parrafo 275-nu tsandimi: chunu tenala, naa jenbaasha chumulabain, naa pebulu kapatala chumulabain, ajkatyu pake'meekutinuushu juntsa yala'tu taadeshu juntsa titulu yachiveti'tananu menesteejdetuve . Menestemiya yala'chundala uñi proyecto ke'faawaamala mushakinuuñuba juntsa paateren mijanu menesteeve.);

Mitya, sentencia 1149-19-JP-/21, chu'chaya noviembre, malu 10, año 2021, Ekuadur Corte Constitucional, párrafo 289-nu entsandipave: (chachillanu ajkatyu pake'meenuushu juntsa uñi'chachilla narati wainuuya juve ti' proyecto

kinudiyanduba chundala, artikulu 398 aakiika pilla Ekuadurnu tsumu naatiñuba, entsa kuinda mijakaatu kumuinchilaren tandiya ke´mija´pawiike´patinuu juve.);

Mitya, sentencia Ekuador Corte Constitucional faawaatu párrafo 340-nu entsandi pave: (ajkatyu pake´meranu de pakaañu pa´shiikaanu.- ajkatyu pake´mera kinuutu entsai keetadi´jiniuuyaa juve: (i) chunu tena tala seran mija´chunuu yaa de juve ajkatyu pake´mera paate, tsandennan uñi´proyecto tena meeme muish pu´ba kinuuve tyatu, (ii) chachillanu ajkatyu pake´mera juushu juntsa Ekuadur uñi kinbera kinuuyaa juve chachillanu, tsenmiren buuditu Defensoria del Pueblo buudi´kamain kaa uñilaba kalen chumulaba (parroquia bain, municipio bain), (iii) tsandenna minería paateeba chachillanu ajkatyu pake´meenushu juntsaya kayu registro ambiental ki´mujchi, tsaimin licencia ambiental kuwaimujchi, b) artikulu 89 minería ley paatenu naatiñubain tsanginuu juve ajkatyu pake´mera paate nara kuinda waintu nara mijakaatu, (v) chachillanu ajkatyu pake´meetyushu juntsaa naa mika uñichi minería taawasha kinu uuden tana´ba tsangimula kinu pudejdetuve, (vi) tsaaba tse´tunmala pake´meekutinuularen tsangikutityulaa acción de protección ke´faawaanu deechu tadeeve, pake´meetyumujchiren naa proyecto ju´ba yala´chundala mushpukinuñubain mijdetu´mitya.);

Mitya, Decreto Ejecutivo 468 registro oficial ya´suplementunu 111, chu´chaya julio, malu 22, año 2022, Ekuaduu uñi tsangidei ti´pave entsa ministeriulanu: Ministerio de Ambiente, Agua y Transición Ecológica; Ministerio de Energía y Minas y Secretaria General Jurídica de la República, vera´mannu reglamento código orgánico del ambiente juushu juntsala chachillanu ajkatyu pake´meekaanu;

Ekuaduu uñi, aakiika pilla tsumu ekuadurchi ya´articulu 147-nu manen numeral 13-nu naatiñubain, tseimin articulo 129 código orgánico administrativo naatiñubain tsandipa´tsuutu:

REGLAMENTO CODIGO ORGANIGO DEL AMBIENTENU WERA´MAJU

Wela´pilla main.- literal d) juushu juntsa wera´mandisa artículo 429-nu shiinamu, entsa mandinu tsuve:

“d) chachillanu chipala paate pake´mera kiika pii´ke´tsura, proyectubain, kayu aa kusas juubain naa minería paate petróleo paate kenuju´ba uñi´chachilla´paate ;).

Wela´pilla pallu.- artikulu 440 juushu juntsa wera´mandiretu entsange mashiikaanu:

(art.440.- naajulaa chachillanu ajkatyu pake´meenu ju´ba. Chipaate keenamu bale ruku uñi´chachi manen gobiernos autónomos y descentralizados judeeshu juntsalabain, tsanginu ti´ma uuden ma taanuu jumi Sistema Único Manejo Ambiental kuñu.

Tsandennaren depake´meeñu chachilla pakatu uñi´kinu tyantsuminu meetyula, tsenmala juntsa taawasha kikaanu tsanginu uñi´chachi naakiñaa urañuba tsanginuuya juve).

Wela´pilla pema.- Art 441 juushu juntsa wera´manditu entsai mashiidinu juve:

(Art. 441.- Chachillanu pake´meenu tinbu.

- Chachillanu pake´meenu tinbu jumiya titulu pemanu patishu juntsanu tsaijnuuyaa juve, entsa reglamentunu wera´majuushu juntsanu)

Wela´pilla taapallu.- wera´mashiikaanu titulu pema consulta previapaate patishu juntsanu liburu pemanu pillatsunashu juntsanu, entsai ma shiidinuuyaa juve:

“(TITULO PEMA

Chachillabain pake´meekutinu chipaate kayu ura´kimishtinuu mannu.

AA SHIIKARA MAIN

**NUTALAA, NENÑUBA, NUNBI, TSANDIPA´TSURA CHACHILLANU
PAKE´MERA PAATE.**

Art.62.- chachillanu pake´mera chipala paate kayu ura´mannu.-Chachillaba kuindakenu lu´tsakiren wa´dija´meenamin pawe´min kenu uñi´chachillaba juntsa paate tsangimishtinuulaba, tsange´chipala paate kayu ura´washkinchunuujũ. Tsanginu uwatala pake´meemu chachilla pake´meekutimulanu narati wainnu juve, mija´chunu tinbutala proyecto paate tyee urañubain tyee mushpu kinuuñubain, tyee wera´tse´tudainuuñubain uñi taawasha kikaanu uwatala cha´chundala.

Tsainmin pake´meemu chachillanu pake´mee kutimula´pensa naati de pañubain tsange piike´tsange wa´kare´piike´tsuunujula.

Chachillanu kuinda narake wele´naa kiika juula lenge´mijainuu ajke´dekutaa bene pake´meenu wa´kaanujula.

Art. 463.- Ámbito. - nunbi ta ere´kenu ju´ba.- Entsa kiikanu kedeiti´patintsushu juntsanu kumuinchi uñi´bale chachilla kenuuyaa de juve, proyecto ke´chunu uwatala chipala tala mushpukinuuba junmala entsa kiikanu naakinuu juñuba tsanginu dejuve.

Art. 464.- Nenñu tsandinduba.- Chachillanu wa´kare´chipala paate kuinda kimshti´chipala paate juushu juntsa tsanginuu de juve: parejundejuyu pensa weelanu vera´keetyumujchi; tsanginuu faamala, bulunchi´kaya, naajulabain punu, ura´pensachi, tsaatuuve pensa, yala´mitya tenñu, kumuinchilanu mijakara, achakaliñuu pensa.

Art. 465.- Nunbi jinu tenñuba. – Chachillanu wa´kare´chipala paate kayu ura´mannuuve ti´ kuinda kimshtya juushu juntsa entsai jinu tyataa tsadekive.

Main. Chachillanu kuinda narake mijakare´chujnu titu chipala paate kayu ura´man mishtinu naa proyecto juula cha´chundala kimshtinu tyatu;

Pallu. Chachilaba buudi´kuinda kemshti´chipala paate pawiike´kuinda uraa kalare´shiikaanu, tsangimee permiso ambiental kukaanu;

Pema. Wa´kaamin, piikemin, naati de pañubain, pawii kemin, chachilla kera´depañubain wa´kare´kuinda kenu uwatala chipala paate;

Taapallu. Kayu permiso ambiental kuwai´mujchin chunu tena tala chumulanu pake´meenu.

Art. 466.- Tsandipa´shiikara. - Chipala paate wa´kare´kuinda juushu juntsa entsandi pa´shiidinu juve:

Impacto Ambiental: Chipaasha wera´tse´tudaishu juntsa paate bain, urabain, urajtubain tse´tudaishu juntsa tyeeba uñi´chachilla deke´chujñu naa proyecto juubain deke´faawaañu, entsai tse´tudaishu juntsaa impacto ambientalve.

Muishpuñu: Chipalasha tyeeba deke´chujñu wera´tse´tudaishu juntsa.

Nunbi nunbi tse´tuñuba: Entsandilaya chipalasha proyecto deke´chujmala jundala keengaya urajtu tse´tudaishu juntsa.

Nunbi nunbi chachilla´chundala tse´tuñuba.- Entsandilaya chipalasha proyecto ke´chujnu uwa tala, cha´chundala, wijtya tala, chunu tena tala, musha´kusas tse´tunujumi. Tsaaba tse´tunmala uñi´chachilla lushi kutyu´bain ura´mannu pude deeve chachillanu gaase´chumishtin jutyu.

Nunbi nunbi tse´tuñanga pensa.- Entsaimiya proyecto deke´faawaamala tsandenna parroquiatala uñi pumu municipionu tsandenna parroquianu bain municipionubain urajtu faleke naa uraa falekiñubain yaiba uñi´chachilla kuinda ke´mijanujula.

Chunu tena tsandenna proyecto de ke´faawaañu mushaama tse´tudaimi: Entsaimiya chunu tenanu chumu chachilla uñi´proyecto ke´faawaañu yala´chuinshama mushaimi.

PAKE´MEEKUTIMU. – Entsanuya naa chachillabain tena tala chumulabain jelesha chumulabain, naa pebulu kapatalabain, yala´chundala uñi´proyecto pullainuu ñubain jundala ke´faawaanu deenubain mijatu pake´meekutinu deechu tala.

PAKE´MEEKUTIMULA YALA´MUMU PIIKE´TSURA. - Uñi´chachilla pake´meenu uwatala chumu chachillanu, tsenmala, naa juntsa tena tala chutyu

ju´bain yala´chuinsha juntsa proyecto muishkita ee nuuve tyashu juntsaa yaibain nenñu tsandya´bain shili piike´uñi´chachillanu pake´meekutinu pudedeju.

CHIPALA KUINDA. - Entsanuya kumuinchi kuindabain, pilla tsurabain, chipala paate ura´mannuuve tya´patu jungajte kayu veevee kuinda te´kala´tanatu permiso ambiental kalaanu.

Entsa kuinda judeeshu juntsa ishpii wandyanuju, tyangenu ju´bain, mikajuu tseimin kuinda pure´welaayaa punuujumi pake´meekutimulanu chipala paate pake´mera.

CHIPALA PAATE PAKE´MERA. – Chachilla wa´di´weta´weta´kuinda tse´tuware´naakitaa chunu tenanubain chachillanu bain uñi´proyecto tse´tudainuushu jundala chumula ura´kusas juuyaa tse´tuwaakaanu ti´pakaya.

PAKE´MEEMU. - Naaju uñi´chachi chi paate keetananu bale pu´ba juntsa pake´meenu tsangidei ti´kimishtimu.

CHIPAATE KEETANANU UÑI´BALE CHACHI. - Entsalaa juntsadeeve, Autoridad Ambiental Nacional, Gobierno Autónomo Descentralizado, Sistema Único de Manejo Ambiental (SUMA) entsachi tsanginu ti´kiikama kuwaala.

CHIPALA PAATE PAS NEMU. - Entsandilaya uñi´chachi main chipala paate pamishtimu, tsangimishtimu, kemishtimu naati depañubain kiika piike´tsuumu.

CHIPALA PAATE NAAKENUTYA´BA PIIKE´TSURA TSANGE´CHACHILANU PAKE´MEENU UWATALA KUWA´TANANU. - Kummuichi pilla´tsura judeeshu juntsa kayu ura´manmishtinu pensa ke´kiñu, proyecto taawasha juula, entsadekinmala chipala tala tyeeba tse´tunuuñuba katapu´piike´tsura, entsala juntsadeeve:

Main. Ma proyecto chipala tala ke´chujmala mushke´tsuren tsanginuuñuba juntsa paate pilla tsura;

Pallu. Entsa paatenu kayu vee paate talabain pike'tsura;

Pema. Plan de Manejo del Registro Ambiental de Proyectos; aa kusas juulabain deke'chujñu naa kaa taawashajuubain bale shupuka kalaanu titu naapetroleo juñubain kalaanu.

CHACHILLA' PENZA NARAKE KERE' LUSHI LAAKAANUUÑUBAIN TSAAVE TI' WANDYA. -

Uñi'proyecto kinu pensa junu, naa aa kusas ke'chujtyaanu ju'bain tsadekinmala tyee tse'tunu jaatya'ba chipala mushakenuuba junmala juntsa paate de tyuitsuraa ñuumi.

PERMISO AMBIENTAL KUNU URABI PENSANGE'PAKAYA. - Entsa permiso kunu uwanu uñi'chachilla yumaa kuinda dekisjañunu keetadi'munuba bale pensaki'mujchi naa firu'pensabain ki'mujchi narati pa'shiikare'piike'kunuu jumi.

CHACHILLA PAKE'MEEKUTIMULA MUTYATYULLAA AA JULA: Entsaa tse'tumiya tenanu chumula wa'namula tsandaa pullai pumula meetyula uñi'proyecto kinu tiyan tsumunu ti'pake'mera, permiso ambiental kukaanjutyu.

PERMISO AMBIENTAL KUNU TI' PILLA. - Chachillanu ajkatyu de pake'meeñu pakatu proyecto yala'chundala mushpunuuve tyatu, demeetyunmala uñi'chachilla permiso ambiental kunu tyatu narati shilipa'tenda iwaanu pala, proyecto ke'jintsunu uwatala keetananu chipalatala musha'ba tse'tunmala naakitaa ura'mannu ju'bain, aa mushkikaa jutyu ñubain, manen naa lushi juubain kunuuma pati'piike'tsuutaa permiso ambiental kunuujumi.

Entsa permiso ambiental kumiya chipaatetala keetananu tsumu aa bale ruku.

AA SHIIKARA PALLU

CHACHILLANU WA´KARE´ PAKE´MERA

AJKE´SECCION

NUNBI TA-ERA ÑUBAIN, JUN TSA URANU MIYA´NENU KEETADINU BAIN.

Art . 467.- Nunbi ta´era ñuba.- Entsanginaa chachillanu pake´mera meneste inu:

Main. Proyecto, obra, chipala tala taawasha kenmala gaase´tireniumala ;

Pallu. Proyectos, obras, chipala tala taawasha kinmala jayuren gaase´kekenuu jumi tutandalabain.

Art. 468.- Entsa uwanaa pake´mera kintsumi .- Permiso ambiental kunu diyandaa chachillanu dewa´kare´ kuinda ke´pake´mera kinuujumi, entsakiikanu ya´artikulu 467-nu naatiñuba tsanginuu jula.

Art. 469.- Bulu nemin keetadimin imu defensoría del pueblo. – ti proyecto kinu ju´bain: Aa kusas uukerake´chujnu ju´bain chunu tena tala tsange kinu pensa taditu uñi´chachi main chi pala pate keetanamu, mijakaanu juve defensoría del pueblo naamaa chachillanu wa´kare´ ajkatyu pake´meenu ju´bain.

Defensoría del pueblo main chachi eenbera kenuyaa jumi, ya puiñubain chachillanu wa´kare´pake´mera kinbera kinuuya jumi ya.

Art.470.- Kuinda kimishtis nemu kiika kunuuyaa jumi; main chachi proyecto ki´jinuti´pasnemu kiika pilla wa´kare´tanañu puitenuuyaa jumi ya´aa bale rukunu.

Kuinda mijakara juushu juntsa chachillanu bain comuna, chunu tena, pebulu, nacionalidaanubain yala´palaachitene pillaaya mijakaanu, lenge´mijanu detsu.

Juntsa kiika lu'tsa'palaa panuuchi pilladeeshu juntsa, entsaa paate tala kuinda pillanu juve:

Main. Ti proyecto, obra, naa taawashajuu kinu ju'ba narati wandyanu juve ;

Pallu. Nutalaa juntsa proyecto taawasha tse'tunuuñubain;

Pema. Juntsa proyecto kinmala chipalasha naa i mushwinuuñubain nara wandyanu jumi;

Taapallu. Plan de manejo ambiental naakitaa kinuju'bain dapepe'paturen nara wandyanu jumi.

PALLU BENE SECCION

NAAKITAA WAIMIN MANEN CHACHILLANU MIKAMIN KINU JU'BA.

ART.471.- Naakitaa ajkatyu chachillanu chipala paate pake'meenu ju'ba.-

Uñi'chachi main entsa paate pamishtis nemu, chachillanu veenu juve kiika pillaa proyecto ke'faawaamala chundala chipalatalabain naake mushpunuuñuba.

Chachillanu pake'meekinuu junmala entsange ta'taa tsangenuu juve:

Main. Kuinda kimishtitu

- a) **Wa'kare'kuinda kimishtya** .- Uñi'chachilla proyecto kimishtimula chachillanu dewa'kaatu kuinda narati wainnuuya jumi, tyaangenu, nenñu, tye tse'tu nuuñuba, tsenmala chachilla mija'pawiikenu jula.
- b) **Página electrónico:** Chachilla kuinda mijandyatu proyecto paate tyeekinaa uñi tsangimishtintsuñuba mijanutyatu juntsa página elektronikanaa wi'kere'kuinda mijanuuyaa juve.
- c) **Videos informativos:** Naa chachillanu wa'kaatubain, kapukachi kere'mija'kuinda pawikekenuu keewaanu juula. Tsangi'miya interneeshabain wi' kere'mijanuu dejuve ti' wainnuujula. Juntsa videu paitya manda minutu juubain kayu juve titaa penchungu minutu juu kayu aajuve.

d) **Kiika chachilla kere´ kuinda mijanu detsu wela:** Nutala tsuuña chachilla proyecto ke´faawaansha chumula kata´kuinda mija´chusai tya´ba jundalaa tsuunujula, tsangi´miya radiutala puite´kerake naa main main vele´kunaaju´bain.

e) **Mubain ji´kuinda mijainsha:**

Uñi´chachillanu kuinda mija´chusai tyatu manbela ji´kuinda mija mijainsha kuinda ke´faawaanu jula. Tsangi´miya chunu tena talaren kiikaa manbelaa wa´kare´detananmala chachilla ja´depake´meenmala urati wandi wanditinuujuula. Malumere juunanuuya jumi kuinda ji´mijamijainsha.

f) **Chachillanu wa´kare´pamishtyaa:** Entsanuya chachillanu wa´kaatu ti proyecto kinuju´bain, ti taawasha aawa ke´faawaanuju´bain narati wainnu jula chachillanu. Tsenmalaa chachilla kuinda narai mija´chunujula.

Pallu. Chachillanu mika´wa´kara: Chachillanu ajkatyu pake´meenu titu veeve mikanuuya jula entsalaa juntsadeeve:

a) **Kumuinchi demeenaren mikaya .-** Entsaya naa radiunu juutalabain kuinda faawara tsenmala proyecto tse´tudainuu chumularen mijainu dejutyu. Naa periodiku juutalabain piike´faawaanujumi, televisión talabain, tyujtyunu darán pa´eres neitubain aa bebe kiikajuunu piike´maitaanubain, página electrónicalabain, redes sociales digitales talabain.

b) **Jadeiti´main main mikayaa.- Entsange´mikalaya:** Tu duvenilanu, jundaa chullalanu,

Proyecto ke´faawaanu chunu tenalanu; chaita chachillanu, kumuna, chunu tena tala, pebulu, nacionalidaala, negeela, montubios, buudi´chumu chachillanubain. Tseimin uñi´chachillanubain provinciashabain cantonshabain parroquiashabain chaitapumulanubain. Juntsa main main mika´pakayanu entsapilla depunuujuve:

Main. Nunbi, naama, ti uranu wa´di´panu ju´ba .

Pallu. Chipala keetanamu bale rukuchi ya'pagina electrónico pumin nanu jumi;

Pema. Correo electrónico pamishtisnemu chachichi;

Taapallu. Ti uwatala ti paatee panuju'bain;

Manda. Nunbii naaju correo electrónico chachilla'kuinda wa'kaanaju'bain;

Manchis-main. Ti malunu jinge kuinda washna'kanuju'bain;

Manchish-pallu. Naaketaa pake'meekutyamula yala'chundala proyecto kinmala musha'tse'tunutsaa tya'ba wainnu pudenudeju.

Pema. Naakitaa pake'meenu ju'ba

a) **Wa'kare'pake'mera:** Uñi'chachi chachillanu wa'kaatu pake'meenu jumi permiso ambiental kukaanu juñuba mijanu, tsaaren umanbelen chachilla kuinda nara minu jula. Tsandennaren chachilla demeetyunmala proyecto urajtaa tyatu tsenmala uñi'chachillaa mijanu jula naa permiso ambiental kunaaju'bain kuwanjutyu'bain.

PEMA BENE SECCION

PALAA, BALENGURA PENZA AJKESHA JINTSUMIBAN LUSHI PAATE BAIN CHACHILLANU WA'KARE'PAKE'MERAKINU.

ART.472.- Chachilla'tinbu palaa.- Chachillanu bain kumuna, chunu tena tala, pebulu, nacionalidaala entsalanu mika'ajkatyu pake'meenutitu yala'panu palaache kiika pillatsure'wainnuu de juve.

Ti kiika juubain naa kapukachi kere'mijainuubain chachilla' panu palaachi tene kimin manen peechui palaachibain kinuuya jumi.

Weepalaachi tandiya jutyuu tenatala chumu chachillanu wa'kare'panu uwatala main yala'palaachi manba'meewaawaakinu menestejuve.

Art. 473.- Balengura pensa.- Chachillanu ajkatyu wa'kare'pake'meenu uwatala entsa paate tala balengure'pensa kinuu de juve pake'meemula: cultura paatebain

lu'tsa'tsa'buudi'chunupaate talabain yaitala naati pa'tse'waataa tsandi pa akake'shuwamu deenubain juntsanandalaa balengure'panuu jula.

Art. 474.- Chachillanu pake'mera kimshtis jinu.- Mallee chachilla wa'di'pake'mera uratala januu juturen jatyuula, tsangityu'bain buuditu pake'meekutin jutyu tyatu mushpunu kila. Tsaanubain uñi'chachilla weelaba kuindakimshtitu pake'mera taawashaya jinuu jumi. Tsaaba tse'tunmala uñi'chachi tsangimshtis nemu yapa chaitalanu tsaayaa tse'tuve ti'pikée'us eenuuyaa jumi.

Art. 475.- lushi paate.- Chachillanu wa'kare'ajkatyu pake'meenu kinu uwatala tyeeba lunshinchi tene kikaake'ba faawaanuumala naaju uñi'chachi proyecto kimshtinduba juntsaa lushi punuu jumi.

TAAPALLU BENE SECCION.

NANBIJAA CHACHILLA WA'DI'PAKE'MERA KINU DEENUBA.

ART.476.- Chachilla'buudi'pake'mera kikutinu tinbu pallu juve:

Main. Kuinda mijakaanchi tene juu;

Pallu. Pake'merachitene juu.

Art. 477.-Kuinda kimshtyanchitene juu chachillanu mijakaanu.- Entsanuya chachillanu ti paate proyecto kindubain naa taawasha aawakindu'bain kuindake'narati mijakaamu, tyee urañubain tyee urajtuñubain naanandalaa naake mushpunu ñubain juntsa paate tala ashati wainnuu jumi chachillanu narai mija'tandiyakinu detsu.

Art.478.- Umaa chachillanu wa'kare'pake'mera.- Entsanuya chachillabain uñi'chachillabain weta'weta'kuinda kimshti'permiso ambiental kunu paate pa akakenu, tsangilaya yumaa ajkatyu kuida narai demija'chu'mitya.

MANDA BENE SECCIÓN.

KUINDA WANDYA TINBU

ART. 479.- Kuinda kimshtinu tse'tuwara.- Entsa tse'tumiya entsangitu.

Main. Proyecto paate kuindajuu obra kikinuu kuindajuu, taawasha chipaatalabain, chunu tenatalabain aawa´mushpunuma juuñu wandya.

Pallu. Proyecto paatebain, obras juubain, taawasha chipaatalabain, chunu tenatalabain dekinmala jayun mushpukinuu juve ti´wandya.

Art. 480.- **Proyectunubain , obrabain, taawashabain, chipalatala kimin, chundalabain kimin dekinmala aawa´gase mushpunuu juñubain, manen kayi gaase´kinuu juñubain wandya.-** Entsa tse´tumiya uñi´aabale chachi yanu tyaapa kumula kiika naake kata´bain chachilla naadetiñubain piike´kuñu keemi, naa aa gase´mushpu kinuu juñubain naa kayi´gaase´mushpu kinuu juñubain mijatu yabain naakiñaa uratya´bain tsange piike´tsuunujumi.

Art. 481.- Ajke´ji´keenu chundala.- Uñi´chachi pamishtisnemu ya´aabale chaita kiika piike´tsuunu pen malutala yumaa nutala proyecto ke´faawaanu ju´ba ji´keenu jumi junsta taawasha kenudetsuyu titu.

Art.481.1.- Ji´kera.- uñi´chachi pamishtis nemu nutala proyecto ke´faawaanuju´ba ji´ne´kuinda kinu wa´kaamu tsangimee yala´kuinda ajke´depiikeñuba mangeenu .- Tseimin tenatala chumula naaken chumu deñubain, naake buudi´taawasha kindetsuñubain, yala´ cultura paate, lu´tsa´tsa´maali naaken chumu deñubain juntsa kuinda ma dete´kakinuu jumi.

Aa gaase´mushpu kinuu junmalaya manchish paimalu jinge kuinda kemishtis nenuu jumi, tsenmala kayi´gaase´mushpukinuu junmala manmalu jinge kuinda mitya nenujumi. Tsanginuuyaa tena tala chumu, chaitala, jundaa chumu uñi´balarukulaba.

Pake´meras nemu chachi kiyutitaaa entsaayaa kesnenuujumi.

Main. Chunu tenatala nan dejuñuba mijanu chachillabain nan dechuñuba mijanu manen buudya´chumulabain nan dejuñubain mijanu, proyecto ke´faamala kalen chundala chumulanubain.

Pallu. Katanu proyecto ke´faawaanmala naajula juntsa keetala dechuñuba mijanu, chumu chachilla supu unbeerukulabain, kumuna, chunutenala,

pebulula, nacionalidaala, negeelabain, montubiulabain
tsange´piike´tsure´bene wa´kaanu ti´mikanu.

Pema. Katapunu tipaate talaa panu ju´bain, peletu paate, tu paate, peletu
tsunañubain bene wa´di´kuinda kimishtikinuuve tyanu.

Taapallu. Tsange shiikaanu kuinda kimishtinu paate tsange´bene
wa´kare´pake´meenubain jundaa chaitala chumula buuditu.

Manda. Chaitalaba buudi´juntsa keetala chumula naamaa mikanu ju´bain ti
uratala peepunuuve ti´bain wa´dinu uwanu tsandi´wainnu. Tseimin
weepalaachi pa´meewaamu chachi mi´kenu jula tsaaba menestejuñuya.

Manchish- main. Jundaa chumu chaitala kuinda wa´kare´shiikaanu
wa´di´depawiike´dyanu.

Kuinda kimishtis nemu dene´keetu kiika piike´tsuunu jumi penmalu
juunaatala aawa´gaase´mushpunaaba junuuñu paatenuya, tsenmala
paimalu junaatala kayi´gaase´mushpukinaa juutala; juntsa kuindanu kayu
vera bain shingaanu juve, futu juula, mapabain pake´mera´kiikabain,
pakare´meena´piikiñubain, videu juuñubain, chachillanu
wa´dijadeiti´piike´tsurabain, nan dewa´diñubain yala´mumu,
depawiike´dyanmala piike´kakakinu muutebain, actajuula, kayu verabain.

Art. 481. 2.- Chachillanu kuinda mijakaanu mikaya.- Uñi´chachi, tenatala
chumulanu kuinda mijakaanu mikanu, chumu chachillanubain, chipala
keetanamu bale chachi, kiika ke´kuñu katu. Proyecto ke´fawaamala aa
gaase´mushpukinaaba junmala manchishpallu malu inshaa chachillanu
wa´di´kuinda kenu jadei ti´mija kaanu. Tsenmala kayi´gaase´mushpu kinaaba
junmala man malu iinaatala jadei ti´kuinda faawaanujumi.

Art. 481.3.- Chachillanu mijakaanu ti´wandya kuinda.- Tena tala chumu
chachillanu wa´dijadei ti´kuinda faawaatu umaa naa kiika pilla juula ti kuinda´baasa
chipala paate chachillanu kuwa´kuinda mijakaanuutene kishenu.

Art. 481.4.- Wa´dimula´mumu shili piike´tsura.- Uñi´chachi kuinda kimishtis nemu chachilla nan dewa´di´meenañubain tsange´piike´tananu juve .

Art. 481.5.- Naa uwanaa pake´meenuu juñubain.- Mantsa chachilla proyecto ke´faawaandala kityu´bain tsaaren yala´chundala tyeeba gaase´tse´tunujaa tyatu, yaibain nenñu tsandindubain narati shili wandi´pake´meekutinu pudedeeve.

Tsaaren yala´pake´meekutinu tya´pakayanu kuinda nara shilli pillajtaaba junmalaya uñi´chahcilla meepungi kindejutyuve.

Art. 481.6.- Chachilla´pensa ke´depañu buute´pilla.- Kuinda mijakaanu chachillanu wa´kare´pamishtitu yala´depañu entsange kiika ke´tsuunuu jula:

Main; Acta chachillanu dewa´kare´depamishtinu

Pallu. Tsadeiñaa ti´pillatsura kuinda mijandala chachilla ji´ne´demijañu;

Pema. Chachilla´pensake´depañu main main piike´eela correo tradiciunalnu;

Art. 481.7.- Chachillanu kuinda dekimish ti´pa´pilla tsura.- yumaa chachillanu kuinda demija kaañu tinbu mallu´tu uñi´chachi kiika piike´e´laanu jumi, aa gaase´mushpukinuu paatenuya manchishpaimalu insha, tsenmala kayi´gaase´mushpukinuu junmala man malu insha. Juntsa kuinda mijakaanu piike´tsuunu entsa entsa pa´punujuve:

Main. Aajamu kera´pilla;

Pallu. Marco legal;

Pema. Antecedentes;

Taapallu. Naake kemishtitaa chachillanu kuinda demijakare´ba juntsa wandya;

Manda. Piike´tsura chachilla kuinda mijatu ti pensaake´depañuba;

Manchish-main. Chipala tala peletu faakinuu tala keengaya;

Manchish-pallu. Conclusiones y recomendaciones;

Manchish-pema . Kiika pilla juula naa futu juula , naavideu juula demai´tekinujula

Manchish-taapallu. Mun piike´bain ya´tyaapachi pilla´chitya kenuu jumi;

Paitya. Wee kiikabain mai´ta keenballakinu.

Entsa kiika chipaate keetanamu aa bale chachi katu ya´pensa naatya´bain tsangideiti´piike´mangunu pudemi, aa gaase´mushpukinuuve tyatuya pen malunu yumaa kiika piikinu jumi, tsenmala kayi´ gaase´ mushpukinuuve tyatuya paimalu iinaatala kiika pike´faawaanu jumi chachilla kuinda mijatu naa de tyañuba keetadinu.

Tsenmala proyectukemu chachinuya mamalu insha yumaa juntsa kiika pilla faawara yanu eenuujula mijanutsu.

Art. 481.8.- Chachilla´pensa ke´palaa de tya´keñu ka´punu proyectusha.- Tsandennaren chachilla ti pensaba ki´de patyunmala uñi´chachi entsa reglamentunu ya´articulo 481.7-nu naatiñubain tsanginuuyaa jumi tsange´kuinda mijakara paate tsantsan juuve ti´mijakara.

MANCHISH-MAIN BENE SECCION

PAKE´MERA TINBU

ART. 481.9.- Pake´mera peepu´jину uñi´chachi kuinda kemishtis nemu pake´mera kide ti´uuden dekinmala man malu insha yumaa pake´mera kinu wa´kare´ kuinda kimishti nuuya jumi. Art 472-nubain- 473-nubain naatiñubain juntsanginuuyaa jumi, entsa reglamentunu tsaave.

Art. 481.10.- Pake´meenu jadei ti´wandya.- Chachillanu wa´kare´ ajkatyu pake´mera kinu chipala paate, tsanginuu jumiya uñi´chachi aa gaase´mushpu kinuumala man malu insha tsenmala kayi´gaase´ba junmalaa pen malu insha.

Art. 481.11.- Wa´di´pake´mera kuinda kinu.- Yumaa chachillanu wa´di jadei ti´mijakaatu juntsa malunu nunbanu kinuti´bain chachilla bain uñi´chachillabain wa´dinuu jula. Proyecto kemishtinuu jumu chachilla naa asambleasha pui´ñuba ne uraa. Tsaaren tandiya kitaa uñi´chachi kuinda kemishtisnemu bain vera, tsenmala proyecto ke´chujtinuu chachibain vera.

Asamblea entsai ta´nuuya juve.

Main. Pake´meekutimu chachilla´mumu bain ya´cedula numeru bain chunu tenabain, ya´pilla´chitya bain shillina kiikasha tsunujumi;

Pallu. Asamblea peepu´jinu.

Pema. Uñi´chachi chipala paate kuinda kimishtis nemu, entsaa asamblea deechu kemishti´ta´un jumi, tsejtu chachillanu tyaangena ja´pu´bain, na´baasa panjutyumi tinbubain, nantinbu panu ju´bain, entsaa ma devanditinu jumi, tsangi tsangiren titi panuju´ba shiikare´wainnu jumi;

Taapallu. Chachillanu keewaamin ke´pamishtinu juve, ti kuindaa chachilla mija´chutu depa´tsuuñuba proyecto kinu paate yala´chunu tena tala tsejtu chipala tala mushakinuuñubain juntsapaate;

Manda. – Tena tala chumu chachilla wa´na mulanu permiso ambiental pake´mera.

Chachilla wa´na mula juntsa paate pawike´ tsai shuwanu pai uraren tinbu tadena.

Entsa tinbu de inmala uñi´chachi wa´na mulanu pai chachi kalaadei ti´pa´nu jumi naa ti pa´shuwa´ba yanu wainnu naa permiso ambiental kunu ju´bain naa kuwanjutyu´bain. Nenñu tsandipa´bain tsange shiikare´piike´ma tsugaanuuyaa jumi;

Manchish- main.- Asambleaanu naati pa´shuwa´ba tsange piike´lenmin pilla´chiti´ tsuumin kenu.

Art. 481.12.- Wa´di´de pañu juntsa piike´tsura uñi´chachi chipala paate pas nenu man malu juunaa tala naake kata´ba kiika piike´puitenuuyaa jumi ya´awechaitalanu.

Juntsa kiika pilla entsa entsa paate panuuya juve:

Main. Aa jamuu kuinda pilla;

Pallu. Marco legal;

Pema. Antecedentes;

Taapallu. Pake´meenu wa´di jadei ti´kuinda tsura juntsabain buutenuujumi;

Manda. Chachilla wa´ditu pake´meranu naati pa´deshuikiñuba juntsa pilla tsura

Manchish-main. Conclusión y recomendaciones;

Manchish-pallu. Kiikanu pilla´chitya tsura chaitalachi;

Manchish-pema. Kayu vee kiika juula mai´ta.

Art. 481.13.- Kiika piike´e´laranu chachilla de pakañu kere´tsantsa juuve ti´pilla tsura.- Uñi´chachi kayu yapa aa chaita ka´taditu kiika yanu piike´de eeñu chachilla depakañu paate manchish paimalu juunaa tala naakiña uraaty´ba tsange piike´tsuunuuyaa juve.

Chachilla pake´meekutimula proyecto chundala mushpunuuve tyatu permiso ambiental kuwanu depai´ñubain, uñi´aachaita ruku yachi naakiña uraaty´ba narati shili pawike´tsuunuu jumi permiso kuwanyatu proyecto kikaanu chunu tenatala. Tsaaren chipala tala mushpu´ba kinuu malaa naakitaa ura´mannu ju´bain, chachillanu ura´ kimishtiwaanu ju´bain juntsanandala narati wainnu jumi.

Art. Manda. - Juntsanmitya entsai mashiidinu tsuve titulu 4”) chachilla chipala paate pandetsun mala pamishti kinuutala), liburu pema juushu juntsa entsai mashuwanu juve:

“TITULO IV

Keetadi´kimishtinu chipalanu ura´chumishtinu”

Art. Manchish-main.- Mangaawive reglamento, código orgánico chipalapaate juushu juntsanu

ENTSANGIDEI TI´AAJAMUU PAKAYA.

MACHA´LURA MACHISHPALLU. - Proyecto kemu chachi naa obra, naa taawasha juu kinaaju´ba chipaate tala keetanamu chaita, uñi´ chaita rukunu tyaapa kuwanbera kinuu jumi naakitaa tena tala chumu chachillabain kuinda mija´paawiiketu yala´pensa patinuu deenuba.

MACHA´LURA MACHISH-PEMA. – Juntsa tena talaren proyecto taere´ kinujaatennaren bene ura´mangeetadinmala kayu junsta kapatala chumula´jungabain ta´eenuunuren tsaakayaña tenshu juntsaa manen chachillanu jundala chumulanu kuinda manmishti´manen yalanu bain wa´kare´yala´ pensa mijañu urami.

MACHA´LURA MACHISH-TAAPALLU. – Plan de manejo ambiental paate manen kasa mannuuve pensa kituya chachillanu mamijakare´manbake´meenu jutyuve.

PENCHUNGA. - Projectobain, obra juubain, kayu vee taawasha chipala tala kinu judeeshu juntsa, artikulu 448-nu reglamento código orgánico del ambiente patishu juntsala, chachillanu mijakare´pake´meenu deeve timeeka.

PENCHUNGA MAIN AJKE. - Permiso ambiental yumaa kuwa´tadenashu juntsaya kayu entsa reglamentu falendyu tsaren jintsunujuve; tsaju´mitya titulo 4 chipala paate patintsushu juntsa leyneu naatiñubain tsanginu dejutyuve.

Art. 7.- Reglamento código orgánico del ambientenu entsa wera´ pilla mangaapunuu

ENTSANGE´ PUITE KEDEI TI´PAKAYA.

MANCCHISHTAAPALLU BIJEE. - Ministerio del Ambiente, Agua y Transición Ecológica, Ministerio del trabajo y Ministerio de Economía y Finanzas, entsala manchishmain chungá malu iinaatála ne'ba entsa bale kiika tsange piike'shuikinu tinbubi titi kiñaá naa ley paate, naa lushi paate, naa administración paate ura'tse'waañaá chipala paate kuinda kismishtimunu lushi paangikinuu deshuikenu ju'ba.

PAITYA BIJEE. - Chi paate keetanamu aa bale chachibain, Gobiernos Autónomos Descentralizadolabain, sistema único de manejo ambientalsha shiinamula, entsala manchish taapai-chungá malu insha yala'estructura organikusha shiikaanuu dejuve naakitaa chipala paate chachillanu wandisneneinuu ju'ba. Entsange shiikaanbera juntsa taawasha kinu mainnu te'kalare'yanu tsangisnede ti' lare'chujnu dejuve.

PAITYA MAIN AJKE. - Naaju proyectuba, obra, naa taawasha ju'bain aa gaase'mushpukinubain chipala tala yumaa sistema único de información ambientalnu 11 de octubre del 2021, corte Constitucional del Ecuador kuinda eemi sentencia **22-18 IN/ 21 Ministerio del Ambientenu.- Chachiklanu mijakare' keemijakaanu kemishtinuu dejuve.**

PAITYA PALLU AJKE. - Naaju proyectuba, obra, naa taawasha ju'bain aa gaase'mushpu kinubain chipalatala yumaa sistema único de información ambientalnu 12 de octubre del 2021, corte Constitucional del Ecuador kuinda eemi sentencia **22-18 IN/ 21 Ministerio del Ambientenu 11 de octubrechi año 2021, Chachillanu mijakare'pake' meenu dejuve.**

PAITYA PEMA AJKE. - Naaju proyectuba, obra, naa taawasha ju'bain aa gaase'mushpu kinubain chipala tala yumaa sistema único de información ambientalnu 12 de octubre del 2021, Corte Constitucional del Ecuador kuinda eemi sentencia **22-18 IN/ 21 Ministerio del Ambientenu 11 de octubrechi año 2021;** Chipala keetanamu aa chaíta rukuchi tsangiñu urave ti'kiika piike'dekuñu tanatu artikuculu 470, entsa reglamento naatiñubain tsanginuuyaa juve proyecto kemu

chachi paitya malu iinaatala ne'ba entsa reglamento balen gure'depiike'tsunmalaren.

PAITYA MANDA AJKE. – Ne'ba entsa kiika uñi piike'tsuumalaren, kumuinchi proyecto, obra, naa taawasha juubain chipala tala naa aa gaase'mushpu kinubain, kayi gaase'mushpu kinubain yumaa peepu'taawasha kentsushu juntsaa sentencia 1149-19 JP/21 malu paitya chu'chaya noviembre año 2021. Tsaimin auto de aclaración y ampliación 1149-19-JP/21 malu 21 chu'chaya diciembre año 2021, entsala Corte Constitucional Ekuadurnu chumu tsaama mushpukiñu sistema único de información ambiental-nu; ke'jintsunuu dejuve chipala paate ura'kimishtinu, chachillanu mijakaremin pake'meemin kinuju entsa reglamentunu naatiñubain.

PAITYA MANCHISH-MAIN. - Ne'ba entsa kiika uñi piike'tsungaamalaren manchish taapaichunga malu iinsha, chipala keetanamu aa chaita ura'mashiikaanu juve sistema único ambiental juushu juntsa titulo IV naatiñubain entsa reglamentunu.

Art. 8.- Mamushaave disposición transitoria taapallu.

Art. 9.- Mamushaave entsa palaa naati'tsandiñuba: (consulta de opinión). - chachilla'naatya'pensa ke'depañuba proyecto kinmala chipalasha muishkiñu paate",

ENTSANGE KIDE TSANTA PALAA.

MAIN JUU. - Entsa decreto tsangidei tikaanu tsaishiidimiya registro oficialnu piike'de faawaamala.